

Erindisbréf stjórnar Félagsheimilisins Klifs

I. Verkefni stjórnarinnar

1. gr.

Stjórn Félagsheimilisins Klifs starfar í umboði bæjarstjórnar að málefnum félagsheimilisins samkvæmt lögum og reglugerðum er þar að lúta og því sem bæjarstjórn felur henni.

2. gr.

Stjórn Félagsheimilisins Klifs er bæjarstjórn til ráðgjafar í málefnum er varða félagsheimilið.

- Stjórn Félagsheimilisins Klifs skal stuðla að aukinni nýtingu á húsinu, m.a. með samvinnu við aðrar nefndir, stofnanir og félagasamtök sem vinna að auknu menningarlífi í Snæfellsbæ. Má þar nefna t.a.m. Menningarnefnd og markaðs- og upplýsingafulltrúa Snæfellsbæjar.
- Stjórn Félagsheimilisins Klifs skal stuðla að aukinni kynningu á húsinu, bæði innan sveitarfélagsins og utan.
- Stjórnin skal leitast við að ná því grundvallarmarkmiði að tryggja að ákvarðanir hennar og vinna séu fyrst og fremst í þágu allra íbúa sveitarfélagsins og skal ávallt setja almannahagsmunum ofar sérhagsmunum, hvort heldur sínum eigin eða einstakra hópa.
- Stjórnin gerir tillögur til bæjarstjórnar um markmið og rekstur Klifs og gerir tillögur um úrbætur. Stjórnin hefur jafnframt eftirlit með því að samþykkt markmið bæjarstjórnar varðandi Klif nái fram að ganga.
- Stjórn Félagsheimilisins Klifs gerir tillögur til bæjarstjórnar um fjárhagsáætlun vegna heimilisins. Stjórnin skal gera úttekt á þeim framkvæmdum sem hún telur að þurfi að fara fram í húsinu og koma með kostnaðaráætlun til bæjarstjórnar vegna þeirra í tengslum við fjárhagsáætlunargerð. Tæknideild Snæfellsbæjar skal vera stjórninni innan handa við þessa vinnu.
- Stjórn Félagsheimilisins Klif hefur ekki heimild til að stofna til fjárhagslegra skuldbindinga fyrir hönd Snæfellsbæjar nema samkvæmt samþykktri fjárhagsáætlun eða með sérstakri heimild bæjarstjórnar.
- Stjórnin skal hafa faglegt eftirlit með rekstri félagsheimilisins og að það starfi innan laga og samþykktar fjárhagsáætlunar á hverjum tíma.

Sé stjórninni ekki falið að taka fullnaðarákvörðun um mál, skv. lögum eða erindisbréfi þessu, teljast ályktanir hennar tillögur til bæjarstjórnar, enda þótt þær séu orðaðar sem ákvarðanir eða samþykktir nefndar. Slíkar ákvarðanir þurfa því staðfestingu bæjarstjórnar.

3. gr.

Stjórn Félagsheimilisins Klifs starfar í samræmi við samþykktir og reglur sem bæjarstjórn hefur sett eða kann að setja um verkefni hennar. Það á einnig við um samninga og samstarf á þessum vettvangi við önnur sveitarfélög.

II. Skipan stjórnarinnar

4. gr.

Í stjórn Félagsheimilisins Klifs eiga sæti þrír fulltrúar. Bæjarstjórn skal á fyrsta eða öðrum fundi að afloknum sveitarstjórnarkosningum kjósa tvo nefndarmenn í stjórn Félagsheimilisins Klifs til fjögurra ára. Félagasamtök í Ólafsvík skipar einn aðila í stjórnina.

Stjórnin kýs sér formann, hafi hann ekki verið skipaður af bæjarstjórn, varaformann og ritara á fyrsta fundi sínum.

5. gr.

Formaður stjórnar Félagsheimilisins Klifs stjórnar fundum stjórnarinnar skv. ákvæðum IV. kafla samþykktar um stjórn Snæfellsbæjar og sér um að allt fari þar löglega og skipulega fram. Hann úrskurðar í ágreiningsmálum sem upp kunna að koma út af fundarsköpum en skjóta má úrskurði hans til úrlausnar stjórnarinnar. Fundarmönnum er skylt að lúta valdi formanns að því er varðar fundarsköp og góða reglu.

Formaður sér um boðun funda. Fundarboðun skal vera skrifleg og tilgreina fundarstað, tíma og dagskrá. Fundarboð skal sent fulltrúum og öðrum sem seturétt hafa á fundum eigi síðar en einum sólarhring fyrir fund.

6. gr.

Stjórn Félagsheimilisins Klifs kemur saman fyrir luktum dyrum á fastákveðnum fundartíma, samkvæmt fundaplani. Skal nefndin gera samþykkt um fundartíma á sínum fyrsta fundi á hverju hausti. Aukafundi skal halda eftir þörfum að ákvörðun formanns eða ef a.m.k. tveir nefndarmenn óska þess.

7. gr.

Húsvörður félagsheimilisins starfar með stjórninni og situr fundi hennar með málfrelsi og tillögurétt.

Þá á bæjarstjóri rétt á að sitja fundi nefndarinnar með málfrelsi og tillögurétt.

Stjórninni er heimilt að kalla til sín sérhvern þann sem tengist málum sem fjallað er um.

III. Fundarsköp nefndarinnar

8. gr.

Um fundarsköp á fundum stjórnar Félagsheimilisins Klifs gilda ákvæði sveitarstjórnarlaga og samþykktar um stjórn Snæfellsbæjar.

9. gr.

Fundargerðir stjórnar Félagsheimilisins Klifs skulu tölvuskráðar. Við skráningu skal fylgja þeim meginreglum sem gilda um skráningu fundargerða bæjarstjórnar, sbr. 16. gr. í samþykkt um stjórn Snæfellsbæjar.

Í tölvuskráða fundargerð skal færa:

- a. fundartíma og fundarstað,
- b. nöfn aðalmanna og varamanna sem sækja fundinn,
- c. nöfn starfsmanna sem sækja fundinn,
- d. heiti og númer fundarefna sem tekin eru fyrir,

- e. greinargóða lýsingu á hverju fundarefni,
- f. bókanir nefndarinnar eða einstakra fundarmanna um fundarefni þar sem það á við,
- g. í fundargerð skal einnig koma fram ef fundarmenn víkja af fundi eða koma til fundar eftir að hann hefst.

Í lok fundar skal tölvuskráð fundargerð undirrituð rafrænt af fundarmönnum.

Strax að loknum fundi kemur ritari nefndarinnar fundargerðinni til bæjarritara sem leggur hana fram með dagskrá næsta bæjarstjórnarfundar.

Fundargerðir stjórnar Félagsheimilisins Klifs eru birtar að afgreiðslu lokinni á heimasíðu Snæfellsbæjar.

10. gr.

Fundur telst ályktunarhæfur ef meirihluti nefndarmanna er mættur á fundi. Í atkvæðagreiðslu ræður afl atkvæða. Mál telst fallið í atkvæðagreiðslu ef atkvæði falla að jöfnu.

Ályktanir stjórnar Félagsheimilisins Klifs til bæjarstjórnar og bæjarráðs skal ætíð senda í sérstöku erindi.

IV. Hæfi, réttindi og skyldur nefndarmanna og annarra fundarmanna

11. gr.

Um réttindi og skyldur nefndarmanna gilda, eftir því sem við á, ákvæði IV. kafla sveitarstjórnarlaga nr. 138/2011, sbr. einnig IV. kafla í samþykkt um stjórn Snæfellsbæjar. Nefndarmönnum er skylt að kynna sér þessi ákvæði.

12. gr.

Um hæfi nefndarmanna í stjórn Félagsheimilisins Klifs gilda ákvæði 19. gr. sveitarstjórnarlaga nr. 45/1998, II. kafla stjórnsýslulaga nr. 37/1993 og samþykktar um stjórn Snæfellsbæjar.

Um hæfi annarra sem sitja fundi stjórnarinnar gilda ákvæði II. kafla stjórnsýslulaga nr. 37/1993.

Nefndarmaður skal víkja af fundi við umræður og afgreiðslu mála sem varða hann sjálfan, skyldmenni hans eða nánustu venslamenn svo mjög að ætla má að það móti viljaafstöðu hans að einhverju leyti. Honum er þó heimilt að gera stuttlega grein fyrir afstöðu sinni áður en hann víkur af fundi.

13. gr.

Nefndarmönnum er skylt að sækja alla fundi stjórnar Félagsheimilisins Klifs nema lögmæt forföll hamli svo sem önnur brýnni skyldustörf eða veikindi. Sé nefndarmaður í stjórn Félagsheimilisins Klifs forfallaður um stundarsakir skal hann tilkynna eða láta tilkynna forföllin til formanns og boða varamann sinn á fund.

14. gr.

Nefndarmaður skal gæta þagnarskyldu um það sem hann fær vitneskju um í starfi sínu og leynt á að fara vegna einka- eða almannahagsmuna samkvæmt lögum eða eðli máls. Þagnarskylda helst áfram eftir að nefndarmaður lætur af þeim störfum. Þetta ákvæði á einnig við um aðra sem boðaðir eru til fundar.

V. Eftirfylgni

15. gr.

Nefndarformaður og aðrir nefndarmenn skulu snúa sér til bærarstjóra með eftirfylgni staðfesta samþykktu nefndarinnar og þannig tryggja að tekin sé afstaða til þeirra og þær framkvæmdar, í þeim tilfellum sem við á.

VI. Gildistaka

16. gr.

Erindisbréf þetta byggist á ákvæðum sveitarstjórnarlaga nr. 138/2011 um verkefni sveitarfélaga og starfsemi nefnda á þeirra vegum, stjórnsýslulögum nr. 37/1993 og samþykkt um stjórn Snæfellsbæjar.

Erindisbréf þetta var staðfest á fundi bærarstjórnar 3. september 2026 og tekur gildi sama dag.

Snæfellsbær 3. september 2026

Kristinn Jónasson, bærarstjóri